


彭山縣鄉土志教科書

昆明志 336

地 280.183

541



教育部批第三九九號

原具呈人徐原烈

呈及四川彭山縣鄉土志教科書稿本一冊閱悉查是書於修輯方志之餘取其宜於教材者編爲四十餘課於提挈綱領中亦頗簡明質實甚合兒童周知本縣大概之用其中應行修訂及點竄字句者與夫應刪除之兩課均分別點定簽批俟照此改正後准作該縣小學鄉土教科書可也原稿本發還此批

中華民國十年七月十五日

教育次長代理部務馬

四川省長公署政務廳指令第九八六號

彭山縣知事覽據該縣修志局局長徐原烈呈編輯鄉土志教科課本懇予審定示遵一案查所擬圖書大致尙無不合既據逕呈 教育部應飭靜候部核着即轉行知照政務廳長向篠印

彭山縣鄉土志教科書

中華民國十年五月十七日

四川建昌道道尹公署指令第四六七七號

令彭山縣卸任視學修志局局長徐原烈

據資呈該局新編彭山縣鄉土志教科課本稿規份新舊志例將全縣山川疆域土宜羅列於四十四課之中披閱之餘無任嘉慰仍將簡明圖另繪一份呈閱稿本存查事關教育課本并仰逕呈 省長公署察核令遵此令

中華民國九年十二月三十一日

道尹黃崇麟

彭山縣知事余 批

原具呈人徐原烈

據呈已悉該紳熱心桑梓編輯鄉土志教科書四十五課以啓童蒙推而行之必多裨益應准付諸剞劂并候照錄 政務廳原電補行令知此批

中華民國十年十月十二日

編輯大意

- 一是書爲引人之鄉土觀念而編其程度又合小學之用
- 一是書計四十三課地理應於鄉土起點自治尤以稔悉鄉土爲亟可於原講地理時間每週分配一鐘一年授畢
- 一彭山人民大半業農故本編於土質特詳
- 一農田最重水利故通濟古佛兩堰特列三課
- 一彭山東西皆山故於物產畜牧等項不憚煩言
- 一本編倉卒成書倘有錯誤俟再版更正 閱者諒之

彭山縣鄉土志教科書目錄

位置 氣候

沿革

縣城

疆域

區畫

戶口 土田

地勢

山脈

河流

水利 通濟堰^上 古佛堰^下 陂塘

土質 上中下

民風

士習

農

工

商

賦稅

倉儲

教育

彭山縣鄉土志教科書

宗教

鄉賢

宦績

畜牧

水產

物產

古蹟

地圖

張綱 李密 朱遵 唐重 列女

劉占魁 張鳳翥 史欽義 蹇閻

穀 棉 木 果 蔬 礦

附后

彭山縣鄉土志教科書

第一課 位置 氣候

地球縣經度在京師偏西十二度二十九分緯度赤道北三十度零十三分高阜燥平原濕春夏多雨秋冬少霜雪據華氏寒暑計暑九十餘度寒只四十餘度氣候和平爲溫帶最良之地

第二課 沿革

縣在周武王時爲彭人地秦惠王使張儀伐蜀獲蜀王於此遂置武陽縣厥後西漢屬犍爲郡西魏改縣曰隆山並立隆州北周改爲隆山郡治縣屬之唐先天元年以避諱改今名宋元明清縣名仍舊元入嘉州明清隸眉州民國府州一律改縣屬建

彭山縣鄉土志教科書

昌道

第三課 縣城

武陽故城歷經移毀明樊瑾知縣事始築今城舊址東南偏臨江水西北倚踞蔡山明末燬於兵清康熙元年縣併於眉雍正八年復設乾隆二十八年知縣張鳳翥繚以土墉建東南北城門嘉慶十八年知縣史欽義仍舊址修之城周七百九十五丈二尺五寸高一丈五尺五寸新增西門爲四年久塌損咸豐庚申蹇闡知縣事擊卻藍賊集議捐修周圍砌石鞏若金湯民國補苴頗資保障

第四課 疆域

縣治在省城南偏西一百五十里東西徑五十里南北徑四十三里面積一千八百七十方里周界三百二十八里爲場十三有半二江流貫上達成華下通嘉叙毗連六屬東界仁壽眉山西界邛崃蒲江北界新津華陽惟府江上游諸地與仁華犬牙相錯奸宄易於竄伏戶籍尤多詭寄司土者和衷共濟無此疆彼界之嫌則境內擴清矣

第五課 區畫

縣屬全境向分四鄉東及東南境曰靈石北曰武陽西迤西北曰忠義南迤西南曰漢安清季變法劃爲三區民國肇建附城合靈河東西爲一區因行政之便劃靈河東爲一分區武陽併忠義二團爲北二區漢安合忠義爲西三區縣分四區各設區

長並辦事處以理團務而弭盜賊

第六課 戶口 土田

戶口編制四區共分二十五團二百三十六甲二千零七十五牌二萬零四百四十七戶計九萬八千五百三十丁口至於土田雍正乾隆嘉慶丈量墾報計上中下田地一千八百二十五頃九十九畝五分四釐土地闢人民聚再能仿戶籍吏之稽查鄉警察之取締又得賢有司之培補元氣不難達富庶之境

第七課 地勢

縣治所轄南短北長東西皆山嶠崿與平蓋對峙關鎖中流縣城占其形勝迤北牧馬山插入介兩江間無高巒深溪之險中

多平壤半屬膏腴有通濟古佛兩堰爲華仁新彭眉五縣水利所賴又爲府江上游嘉陽大道之水陸交衝但北有新津河如帶南有眉山城如礪故歷年兵事人民得慶安堵焉

第八課 山脈

縣境山脈分爲三條牧馬山由省南四十里突起經仁壽新津至治北高陸店葉店子入境山勢綿互抵武陽江下流爲中條東山自簡陽龍泉驛分支西行至黃龍溪鍾家山入境東趨爲彭亡峒嶽達鼎鼻山爲東條西山自新津秦山埂邛嶽銀子坳入境至北平山連峯疊起迤翔鳳山達四高山抵天公山到眉境爲西條

第九課 河流

彭山縣鄉土志教科書
三
河流發源岷江自灌縣寶瓶口分流經崇慶縣至新津滙邛蒲諸水趨入縣境曰武陽江其流經成華兩縣下至黃龍溪合赤水注入縣境爲府江二水東流合於雙江口本境水道之大交通便利惟此二流至三區之毛河僅受西山溪澗之水比諸江流祇如溝澮經江魚堤東趨達眉山境入江

第十課 水利一

通濟堰上

通濟堰原名遠濟灌新彭眉田唐章仇兼瓊創始五代張琳修復元雍熙重修明宣德時改今名傍新津修覺山麓砌以紅石堵南河水入堰分渠澌溉明季堙於兵燹清乾隆初黃廷桂督川檄新彭兩縣重修仿都江堰制編竹納石層壘爲隄復濬古

溝其流斯暢

第十一課 水利二

通濟堰下

乾隆十八年知縣張鳳翥從縣民甯朝玉盧敬臣等請修復古制鳳翥會同新令徐堯詳准增加舊堤截西河之水東注於堰自魚波橋北添砌新隄壅水入溝水源益旺經營兩載乃造成功彭山復規舊制增二十八渠分上中下西池共八段灌田計三萬九千五百八十七畝鑿翻水口分入眉州筒眉山十四堰之田益活

第十二課 水利三

古佛堰

古佛堰距縣治東北五十八里乾隆二十五年知縣張鳳翥創

修逾年以事去功未竟越二年知縣陳奉茲從縣民周文良等請復狀廢辦並移知仁華二令會勘准由官民捐貲開修自仁壽羅家林起壘堤堵水鑿溝經古佛洞下迤西接野桂壩新溝水到金華山麓穿隧通流下灌彭仁華三縣民田至今利賴

第十三課 水利四

陂塘

縣境田畝用堰水溉者十之六七山田滿蓄冬水即以陂塘潴積爲防旱之計秋閉春開每刊碑定例故山農以塘爲田母車灌分配多寡不同修築亦公私各別其著名公用者曰龔大塘五口塘蔡家塘紅魚塘彭家大塘陂塘補堰渠之不足古循吏講求水利多於斯注意焉

第十四課 土質一

試望平橫山原蒼莽青龍壩土在縣北區厥土青黎質帶沙壤厥田爲中上稻宜和宜糯地宜稷宜菽宜蔬惟冬宜麥厥木爲條岷江貫注 觀音壩土居縣中心厥土微黎質含白壤厥田爲中中宜稻宜稷宜麥厥木爲枿溝塍綺錯 牧馬山土在縣中條厥土黃壩質含粘滯厥田爲下下潛水宜禾阜坵宜稷宜薯宜豆宜番椒宜棉花惟冬土枯麥不蕃殖

第十五課 土質二

公議壩土在縣西北厥土赤墳質含硝冷厥田惟下下禾稼平平下隰既潛藝麥不宜 謝市壩土在縣西郊厥土頰紅質含

沙壤厥田惟中下宜稻宜稷宜菽宜黍冬宜小麥草木叢龍山阜其藝 保勝山土縣西奧區厥土赤壤質帶沙泥厥田惟下中溉水宜稻岡阜宜稷宜菽宜黍冬宜蕎麥厥樹宜桑飼蠶乃茂

第十六課 土質三

雙江山土由縣而東厥土赭紅質含沙壤厥田惟下中宜稻宜稷宜菽宜蠶豆迤東高阜厥木爲松 蔡家山土西枕城堙厥土淺黃質黏性緊厥田惟下下蓄水宜禾遵彼高坵黍稷其藝垣惟有竹墾殖無遺 兩江沙土其色油油沙質澱壤宜菘宜黍宜稷宜菽宜菜麥下隰沙泥糖蔗是藝厥木爲柏

第十七課 民風

彭民樸實謹厚尊吏畏法自改革後風氣一變驍悍之民樂於從軍山野之民間出貿易青年子弟頗知嚮學惟忠孝遺風漸趨漸遠社會尙任俠寢成流俗其衣食住爭以時尙聘婚喪祭半存古禮三月三日士女遊山踏青四月十日邑人酬神演劇至端節重九角黍相遺登高置酒亦猶眉俗之近古也

第十八課 士習

華陽國志士尙節義光武嘉之謂武陽爲士大夫郡宋樵樓記以詩書爲業故家文獻爲重尙樸素不競浮華至取士學額清雍正縣復設時僅四名逮乾隆兩次遞加至八名廩增各十一

名清末政學變遷注重科學一時人士遊學海外肄業京師考求實學風氣丕變雖舊有宿學皆化其錮蔽之習而閎通之士融貫中西宣暢雅言尤爲世所推崇

第十九課 農

蘇東坡遠景樓記云農夫合耦以相助縣爲農國東西兩山時闢新地已無曠土勞動倍加艱於事畜耕壩者三時作苦收穫雖豐負擔較重濱江之農沙壤易耕每遭水患然亦安土重遷縣辦有農事試驗場蠶務局暨縣鄉農會等尙得軍事收平竭力提倡其開闢利源正未可限量也

第二十課 工

攻木攻金攻石陶冶繪畫雕刻縫紉染織操塲足資日用近設貧民工廠開辦籐科蓆科各色布疋逐次改良實業所蠶桑種植漸參新法試種紅花茶樹亦見成效年來民間注重工業謝市紙廠暨各場軋花機均獲利益其他爲人傭賃者曹達工廠間接直接不下千人在新津築堰淘溝者亦數百人綜核全縣勞工約佔十分之一二

第二十一課 商

縣境控川南上游水陸交通惜幅幘不廣天然物產無多故列肆通商尙無豪商大賈惟皮硝特產係出口大宗並牛羊皮鷄鴨毛豬鬃絲蠟銷場亦旺其餘油米雜糧自爲販運葉菸蕃殖

銷於遠縣四月神會省城及隣封各商雲集售貨價格約達二三萬元以上

第二十二課 賦稅

納稅本人民義務徵收官吏住局經收縣正稅即前清之丁條糧原額四千三百四十四兩九錢七分二釐民國紀元經縣會議請免濫糧五十四兩一錢五分九釐二毫民國六年水災濫糧仍宜請免副稅即前之津捐按正稅每兩徵銀五兩一錢六分三釐附加稅即前之警練費今之糧戶捐團練徵收等費至於田房契稅及菸酒油糖肉釐莫不歷年增加較隣封爲重地瘠民貧頗難擔負

第二十三課 倉儲

舊志載常平倉添悌實新字盈豐恒八向七十二間義倉十九處十九向二十八間貯穀均以萬計逮嘉慶年間先後賑饑平糶隨即照數買還迨道咸年間奉文糶變軍餉時官紳經手弊混穀即短折光緒六年川督丁寶楨通飭各縣設積穀倉彭山奉文遵辦所收之穀存貯城內川主宮穀凡三千四百一十四石零民國軍興提撥罄盡惟孤貧養濟取給於社濟田租而已

第二十四課 教育

舊時教育官設訓導以課生員治城復立江源書院延院長主講以補學官所不及四鄉有鄉學六士紳教之專課經書制藝帖括以應科舉清末詔辦學堂縣立高等小學校一兩等學校

二國民學校四十有四女學校三有勸學所設視學一以總其成勸學員三分區勸導又立教育會爲討論機關用策進行

第二十五課 宗教

儒教以綱常倫紀大中至正之道垂教萬世士人皆崇奉之釋氏慈悲廣大道家制欲養心均足以維持世運縣境多寺觀僧道殆百數人至天主耶穌分新舊兩教均以敬天愛人爲宗旨靈魂永生爲效果城內東街南街建有教堂醫館民國成立信教自由載入約法奉其教者益衆縣民約達十分之一

第二十六課 鄉賢一

張綱

張綱字文紀東漢人少明經司徒辟爲御史漢安元年詔遣八

使巡行風俗綱獨埋輪於洛陽都亭曰豺狼當道安問狐狸遂抗疏劾大將軍梁冀無君十五事帝知綱言直不用時廣陵張嬰亂冀諷尚書出綱爲廣陵太守欲以事中之綱單騎就職率吏卒十餘人直造嬰壘宣布朝廷德信安慰之嬰感悟歸降綱在郡一年卒嬰等五百餘人制服行喪送至原籍負土成墳而去民國十年由縣教育會呈准省署同李密祀於忠孝專祠

第二十七課

鄉賢二

李密

李密字令伯父早亡母何氏改醮密時年四歲感念以致成疾祖母劉閔其孤弱躬自撫養成立事祖母以孝聞劉有疾常涕泣側息夜不解帶餼飲湯藥必先嘗後進暇則講學治春秋經

傳多所通涉機警辨捷辭義響起晉泰始初詔徵爲太子洗馬密上陳情表帝覽之曰密不空有名也後趨詔遷漢中太守一年去官著述理論凡十篇

第二十八課

鄉賢三

朱遵

朱遵字孝武東漢人建武初公孫述外結隗囂據蜀僭號遵召郡人申明順逆拒不奉述號令述發兵攻之遵率郡中子弟兵與戰相拒於六水門旣念衆寡不敵乃埋其車輪示死戰及兵刃旣接遵失利擬退守忽絆馬墜被刃喪其元旋以手摸頭知失首乃斃時人高其忠憤瘞之世傳武陽有無頭將軍即朱遵也崇祀忠義祠

第二十九課 鄉賢四 唐重

唐重字任聖少有大志宋大觀中登進士累官起居舍人重言開邊之禍起於童貫宜誅貫以謝天下後知京兆府兼府經略制置金將圍城重度不可支先以書別其父曰忠孝不兩立男義不苟生以辱吾父其父報之曰汝能以身殉國吾含笑入地下矣踰月外援不至城陷重以親兵百人血戰中流矢沒唐孺上其書帝悼之贈資政殿大學士謚恭愍

第三十課 鄉賢五 列女

宋程氏適眉山蘇洵通經史有氣節生子軾轍時洵遊學四方程課二子書甚嚴每語家人曰二子必不忝蘇門軾嘗讀范滂

傳慨然問曰軾若爲滂大人許之否程曰爾能爲滂吾顧不能爲滂母耶又元楊氏適內江虞汲生子集宋末兵亂汲挈家避嶺外無書可讀楊口授集以論孟春秋歐蘇文比還已盡讀諸經通大義後集以文章名世皆母訓也二氏德媿孟母均可法可傳

第三十一課 宦績一 劉占魁

劉占魁雲南舉人雍正八年縣治復設授彭山知縣其時地曠人稀荆棘蒼莽占魁下車後卽開闢荒廢鳩工庀材學宮壇廟官署市廛次第修舉常督工與役同甘苦烈風淫雨中從事不遑人不知爲縣尹也隨召還流亡修明禮教政尙寬平以培元

氣開風化爲本人謂創始之功偉焉

第三十二課 宦績二 張鳳翥

張鳳翥字梧岡上虞人乾隆十三年進士選授彭山知縣鳳翥以儒術節吏治一以興革爲任尤留心水利開復通濟堰新添二十八渠創修古佛堰上中下三段正筒三十四灌田萬有二百畝又築土城修學宮壇廟置祭器以重祀典置學田以惠寒峻縣經兵燹文獻散軼鳳翥創修武陽小乘四卷厥後因事去官邑人追思不置建清愛祠以祀之

第三十三課 宦績三 史欽義

史欽義字醇菴餘姚副貢嘉慶十三年以軍功授知縣事喜士

類留心文獻政餘輒臨臯比與諸生講經史不倦十六年川督常明奏修通志檄州縣一律續修以昭同文之盛欽義檢古籍參稽舊志博取諸家記載聘縣士之淹通者互參而釐訂之兩歷寒暑成嘉慶志六卷縣志始云大備任彭七年興廢舉墜善政纍纍去後民猶思之

第三十四課 宦績四 蹇閻

蹇閻字子和貴州遵義人咸豐五年由廩生剿辦桐梓縣匪出力以訓導改官四川知縣十年十一月署縣篆滇匪李永河盤距叙瀘川南震動彭山向僅土城閻辦團募勇爲防禦計十一年三月李逆上竄縣境閻率團勇敗之乃改建石城十月攻快

活山大破賊巢賊相戒勿犯縣境眉民潛移彭山界牌以自衛後奉檄兼辦眉彭團練旋升署茂州去以功擢署建昌道賞布政使銜年四十六卒川督吳棠奏請勅建專祠以祀宜矣

第三十五課 畜牧

牛與豕有益於農鄉人多蓄之間有牧羊者沿舊法生息不蕃近有集資賃闢牧場參以新法成效尙未大著若雞鴨鵝蜂蠶蠟一樹縣東西山頗多惜少培植放蟲取蠟歲收無幾欲策富強當於斯注意

第三十六課 水產

水產鱗介府南二江最多其次溪沼田塘所在亦產江魚之佳鯉與鯪其著者也最佳鱒魚色分青白烹用豚脂味美蒸食尤鮮江團產於龍潭下游首尖眼細腹大身長有獨刺蒸烹佐箸鮮美異常鯽魚多產田間腹大脊隆色青體促惟牧馬山塘所產色白肉細刺軟青龍場口清末曾倡辦魚業擬具簡章稟縣立案倘得賡續再辦縣中農業又添一副產矣

第三十七課 物產一

縣民種稻山場各因土宜其宜山者有南京早北京早蓋棗黃暨百花穀數種宜者有白泥黏青泥黏大毛香小毛香糯則有柳條糯拖鎗糯其宜旱者惟紅蓮稻薏子穀和藥者紫色稻

類皆清明前後種七八月收惟雨陽時若庶大有秋其粃米糯米均以青市一帶為精販運上下河獲利尤厚

第三十八課 物產二 棉

我國棉種由元世祖征印度時棉傳入先植南省繼播來川縣屬東西牧馬諸山土性宜棉惜土種多印度種美種少美國種復拘守舊法故秋收不厚近實業家注意研究始知棉性易變宜擇優種先鬆土質列行必疎繼壅肥料入伏折顛多發旁枝開花結實秋穫乃倍至選種換種方法防病防蟲要術另有專書

第三十九課 物產三 木類

桑柘飼蠶松柏為棟楠名文章木造屋修船均適用紅豆質堅

細而色紅以作器具人珍重之樟樹熬腦氣質芳馨槐檀桐梓土性最宜此種良材植之利倍白楊山多易長質輕理細解片宜造風扇青杠質韌材中矛戟適於農器至橙柳宜濕苦棟宜燥縣屬平蓋觀仙女山兩處俱為公有森林地點有提倡保護之責者當於斯注意焉

第四十課 物產四 果類

鮮果得清虛之氣經時成熟食之可和脾胃有益衛生縣屬東西山產早桃名芒種桃以先時可食人多植之大者盈握膚理通紅質脆味甜清芬適口至荔枝縣不多產惟平蓋觀一株冬花夏實皮艷肉腴其味甘酸果中仙品至梨園橘林鄉間頗夥